

Provedoria Direitu Umanu diskorda fó indultu ba eis-padre Daschbach



Provedór Direitu Umanu no Justisa (PDHJ), Virgílio Guterres. Foto TATOLI/Antonio Daciparu

DILI, 15 Maiu 2026 (TATOLI) – Provedoria Direitu Umanu no Justisa (PDHJ, sigla portugés) la konkorda ho desizaun Prezidente Repúblika, José Ramos-Horta, atu fó indulta ba eis-padre Richard Daschbach, ne'ebé nia naran tama mós iha lista indultu tinan ne'e.

“Kuaze kada tinan eis-padre Richard nia naran tama hela de'it iha lista indultu. Ami hateten katak laiha razaun atu fó indultu ba ema pedofilia ida, tanba pedofilia ho pornografia infantíl ne'e la'ós baibain maibé krime grave”, Provedór Direitu Umanu no Justisa, Virgílio Guterres, hateten ohin.

Nia lembra katak iha tinan kotuk mós nia naran tama iha lista indultu no bainhira PDHJ haree no bá hasoru malu ho Prezidente Repúblika ho informalmente fó hanoin katak, provedór laiha kompeténsia atu halo intervensaun iha desizaun Prezidente Repúblika nian, maibé se bele rona hanoin husi vítima ka representante vítima nian.

“Ami apresia tebes tanba iha tinan kotuk Prezidente Repúblika bele fó espasu atu rona hanoin husi vítima no representante vítima nian, ne'ebé ikus mai la fó indultu. Maibé tinan ida-ne'e mosu tan fali. Husi parte PDHJ laiha razaun morál atu fó indultu ba eis-padre ne'e, tanba to'õ agora nia seidak rekoñese no arrepende nia sala, no husu deskulpa ba vítima sira”, nia lamenta.

Hodi salienta katak loloos ne'e Tribunál fó pena tinan 20 ba nia, maibé tanba katuas ona mak hatún tiha pena ba de'it tinan 12.

“Oportunidade ne'e ha'u hakarak fó hanoin ba Prezidente Repúblika katak dala-ida tan rona vítima sira-nia hanoin, nune'e ita labele fó presedente ne'ebé ladi'ak, tanba ida-ne'e hakanek vítima sira-nia fuan. Tanba indultu ne'e, iha ita-nia liafuan karik Estadu atu fó deskulpa ida ba nia”, nia hato'õ.

Jornalista: Arminda Fonseca Editora: Maria Auxiliadora

PDHJ: Tribunal Reduz Ona Pena Tinan 12 Ba Daschbach , Idade Labele Sai Tan Razaun ba Indultu

neonmetin.info/buletin/2026/05/15/pdhj-tribunal-reduz-ona-pena-tinan-12-ba-daschbach-idade-labele-sai-tan-razaun-ba-indultu

neon-metin

May 15, 2026



Kondenadu Pedofilia Richard Daschbach (Foto-Ap)

Reportajen David da Costa

Provedór Direitos umanos e Justisa, (PDHJ) konsidera, idade la bele sai tan razaun atu fó indultu ba eis padre Richard Daschbach, tanba Tribunal uza tiha ona konsiderasaun ne'e hodi hatun nia pena husi tinan 30 ba tinan 12. Tanba pedofilia ne'e krime grave no to'o agora Daschbach seidauk rekonhese nia sala, arrepende ka husu deskulpa ba vítima sira.

Provedór Direitos umanos e Justisa, (PDHJ), Virgílio da Silva Guterres "Lamukan", governu tinan-tinan naran eis padre Richard Daschbach, sempre iha lista indultu, maibé loloos ne'e kazu hanesan pedofilia laiha razaun atu fó indultu, tanba ida ne'e kazu krime ne'ebe grave.

"Entaun ami dehan laiha razaun atu fó indultu ba ema pedofilia, tanba pedofilia la'os krime baibain, ne'e krime ne'ebe grave," dehan Provedór "Lamukan", ba jornalista sira iha Exelsior Resort, Pantai kelapa, Sexta 15/05.

Nia haktuir, iha tinan kotuk, bainhira eis padre Richard Daschbach naran tama lista indultu, PDHJ ba hasoru malu ho Prezidente informalmente no fó hanoin katak provedór laiha kompetensia atu halo intervensaun iha dezisaun presidente nian.

Maibé iha momentu ne'e PDHJ akonsela presidente, se bele presidente rona hanoin husi vitima ka representante vitima ninia. Apresia teb-tebes tanba iha tinan kotuk Prezidente fó espasu atu rona hanoin vitima, ne'ebe ikus mai enkoraja Prezidente atu la fó indultu.

Nia dehan, agora tinan ida ne'e Richard Daschbach naran mosu tan fali iha lista indultu, tanba ne'e, husi parte provedór laiha razaun moral atu fó indultu ba Richard Daschbach, tanba to'o agora nia seidak rekoinese nia sala, nia sei dauk arrepende, nia seidak husu deskulpa ba vitima sira.

Nia salineta, se nia husu deskulpa no arrepende ona nia sala, kestaun seluk bele sai razaun ba presidente, mas to'o agora nia la husu deskulpa, ema balun dehan tanba nia katuas ona, nia idade ona entaun presidente fó indultu ho razaun ida hanesan ne'e.

Maibé atu hatete Tribunal lolos fó pena ne'ebe liu tinan 12, dala ruma bele to'o 30 anos tanba krime ne'e grave. Maibé tribunal hatun tiha pena ne'e mai 12 anos tanba razaun nia katuas ona, nia idade ona entaun fó de'it 12 anos.

Ne'ebe razaun ida katuas ne'e labele ona uza atu fó indultu, tenke iha razaun seluk, tanba razaun ida nia katuas ne'e, Tribunal uza tiha ona atu hatun ninia pena husi tinan 30 mai iha tinan 12 ona.

Tanba ne'e labele uza razaun ne'e, maibé bele uza razaun seluk, nia tenke arrepende ho nia hahalok ne'e, husu deskulpa ba vitima sira.

"Ha'u fó hanoin ba Prezidente atu rona vitima sira nia hanoin, atu nune'e, ita labele fó prezedente ne'ebe ladi'ak, ida ne'e hakanek vitima sira," nia dehan.

Nia subliña, tanba indultu ne'e buat ida karik estadu atu fo deskulpa ida ba eis padre Richard Daschbach, maibé problema eis padre la husu deskulpa ba vitima sira, se nia husu deskulpa, estadu mos bele husu deskulpa ba nia.

"Ita bele perdua malu ita kuandu husu deskulpa, ba hau fó perdaun. Mas se diskulpa laiha, ita la konfesa ita nia sala, oinsa mak ita bele fo perdaun," nia afirma.

Tanba ne'e maka Provedór Direitos umanos e Justisa la konkorda inistativa fó indultu ba ba eis padre, fo indultu ba eis padre ne'e hanesan insulta vitima sira.

Tribunál Oecusse Kondena Richard Daschbach Kadeia Tinan 12

Antes ne'e, Tribunál Distritál Oecusse (TDO), liu hosi desizaun finál, iha fulan Dezembru tinan 2021, kondena eis Padre Richard Dasbach, tenke kumpre kadeia tinan 12, tanba nia involvimentu ba krime abuzu sexuál menór no pornografia infantíl, tuir prosesu iha loron 07 fulan-Setembru 2020, prosesu NUC 0022/19.PGGCC.

Akuzasaun ne'ebé Tribunál fó ba eis Padre Richard Dasbach hosi Estados Unidos América (EUA), hamutuk tinan 30, bazeia ba leitura akordaun hosi Juiz Yudit Pamungkas, maibé ikusmai deside kadeia tinan 12, tanba haree mós ba idade inklui kondisaun fíziku hosi lezadu.